

Abenduaren 25ean
JAUNAREN JAIOTZA

Agurra

Gu salbatzeko jaio den Kristogan agertu zaigun
Jainko gure Aitaren bakea eta maitasuna zuekin.

Sarrerako Oharpena

Eguberri on! «Bai harrigarria zure guganako errukia! Bai neurrigabea zure maitasun samurra! Zerbitzaria erosteko, Semea ematea». Pazko gaueko hitz hauek Eguberritan hasten dira betetzen, Jaunaren errukia giza haragiz jantzia ikusten dugunean. Semea eman digula ohartzen garenean.

Pozik gaude gaur: Jainkoa-gurekin da, gure arteko egin da, gu Bere arteko egiteko. Onar dezagun, ospa dezagun, gora dezagun!

Damu-otoitza

Jaunak agertu digu bere erruki handia Semea gure artera bidaltzean.
Dohain miresgarri hori eskertuz aitoren dezagun bekatari garela.

—Jesus Jauna, Mariagandik jaio / eta gure senide egin zinen
Jainkoaren Semea: erruki, Jauna.

—Jesus Jauna, gure ahuleriak ezagutzen / eta maitasunez ulertzen
dituzun Gizonaren Semea: Kristo, erruki.

—Jesus Jauna, gu guztiokin familia bat bera egiten duzun / Aitaren
Lehen Semea: erruki, Jauna.

Erruki dakigula Jainko guztiz ahaltsua, eta, gure bekatuak barkaturik,
eraman gaitzala betiko bizitzara.

(Nahiago bada, egin daiteke beste sarrera hau "kalenda" zaharraren erara emana: agurraren ondoren oharpena eta damu-otoitza utzita hau irakurri eta ondoren Aintza zeruetan).

Senideok, berri on bat, herri guztiarentzat poz handi bat, iragartzen dizuegu; pozkarioz entzun ezazue. Milaka urte igaro ziren, hasieran, Jainkoak zerua eta lurra sortu eta gizakia bere antz-irudira egin zuenetik; eta milaka urte uholdea atertu eta Goi-goikoak, itunaren eta bakearen seinale, ortzadarra distirarazi zuenetik; Erroma hiriaren eratzearen 752garren urtean, Octavio Augustoren menpeko 42garren urtean, lur osoan bakea nagusi zenean, munduaren seigarren adinean, orain 2018 urte, Erromatarren menpean zegoen Israelgo herri xume den Judako Betleemen, aska batean, ostaturik ez zutelako, Daviden jatorrikoa zen Joseren emazte Maria Birjinagandik, Jesus jaio zen; betiereko Jainkoa, betiereko Aitaren Semea eta egiazko gizona; Mesias eta Kristo zeritzana, gizakiek itxaron zuten Salbatzailea. Berari aintza eta gorespen gizaldi eta gizaldietan. Amen.

Aintza

Kanta dezagun pozez beterik Eliza osoarekin, aingeruek gau santu hartan Betleemen abestu zuten bezala: «Aintza zeruetan».

Otoitza

(Bezpera-arratsaldeko Meza)

Jainko Jauna, urtero pozten gaituzu

gure erospenaren itxaropenaz;

iguzu, salbatzaile bezala pozik hartzen dugun zure Seme maitea,

beldurrik gabe ikus dezagula, epaile bezala etorriko denean.

Zurekin eta Espiritu Santurekin batean

Jainko eta errege bizi baita gizaldi eta gizaldietan.

(Gauerdiko Meza)

**Egiazko argia den Kristoren jaiotzaz
argitzen duzu, Jauna, gau santu hau;
iguzu, lurrean argi honen distirak ezagutu ditugunok
zeruan Haren aintzaren ederra goza dezagula.
Zurekin eta Espiritu Santurekin batean
Jainko eta errege bizi baita gizaldi eta gizaldietan.**

(Goizeko Meza)

**Jainko ahalguztiduna,
gizon egin den zure Hitzaren argi berriak betetzen gaitu;
iguzu, gure bihotzetan argi egiten duen fede honek,
gure egintzetan ere distira dezala.
Zure Seme Jesu Kristo gure Jaunaren bitartez,
Zurekin eta Espiritu Santurekin batean
Jainko eta errege bizi baita gizaldi eta gizaldietan.**

(Eguneko Meza)

**Jainko Jauna, miragarriak egin dituzu
gizakia zeure antzeko eginez,
eta miragarriagoak, Kristoren bidez hura goi-mailara goratuz;
iguzu, gizatasunean gurekin bat egin den zure Semeak,
bat egin gaitzala Berarekin jainkotasunean.
Zurekin eta Espiritu Santurekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Gizaldietan isilik egondako Hitza, Profetek fedez itxarondakoa, Andre Mariarengandik jaio zaigun Kristo da. Bera da artzainei agertua; Bera, herri guztiei adierazia; Bera Elizak pozkarioz altxor bezala gorde eta hots egiten duen salbamenezko Hitz bizia. Entzun dezagun arretaz.

Gauerdiko, Goizeko eta Eguneko Meza ospatzen denean, Irakurgaiak har daitezke hiru Mezatarako emandakoen artetik. Bezpera arratsaldeko Meza ospatzean, bertan egongo den jendeak hori izango badu Eguberri-Meza bakarra, egokiago gerta daiteke 25erako ematen diren hiru ebanjelioetako bat hartzea. Hemen, lau meza horietako testuak eskaintzen ditugu.

(BEZPERA-ARRATSALDEKO MEZA)

Lehenengo irakurgaia (Is 62, 1-5)

Isaias profetaren liburutik

Sionen maitez ez naiz isilduko, Jerusalem maitez ez naiz geldi egongo; Haren zuzentasuna distira bezala argituko den arte, Haren salbamena zuzia bezala biztuko den arte.

Ikusiko dute herriek zure zuzentasuna, erregeek zure ospea; izen berria ezarriko zaizu, Jaunaren ahoak emana. Koroa eder izango zara Jaunaren eskuan, errege burestun, zeure Jainkoaren eskuan.

Ez dizute berriz deituko «Utzia», ezta zure lurraldeari ere «Hondamendia». «Nire atsegina» deituko dizute zuri, eta «Senarduna», zure lurraldeari. Atsegin izango baitu zuregan Jaunak, eta senarduna izango da zure lurraldea. Mutil gaztea neskatzarekin ezkontzen den bezala, zure eraikilea zeurekin ezkonduko da; senarrak emaztearekin hartzen duen poza, zurekin hartuko du zure Jainkoak.

Erantzun-salmoa (Sal 88, 4-5. 16-17. 27 eta 29)

Jau- na, zu-re mai - ta - su-na a - bes - tu - ko dut
 be - ti - ren be - ti.



«Egin dut nire hautatuarekin ituna,
David nire morroiari zin egin niona.
Betiko sendotuko dut zure hazia,
menderen mende eraikiko zure aulkia». R/.

Bai dohatsu, Zuri pozez oihu egiten dakien herria:
Jauna, zure aurpegiko argian dabila.
Zure izenaz dira beti pozten,
zure zuzentasunez harrotzen. R/.

Berak deituko nau: Zu zaitut Aita,
ene Jainko, nire salbamenaren Harkaitza.
Gordeko diot beti nire maitasuna,
zintzo edukiko egin nion ituna. R/.

Bigarren irakurgaia (Eg 113, 16-17. 22-25)

Apostoluen Eginetatik

Egun haietan, Paulo Psidiako Antiokiara iritsi zen eta, hango sinagogan zutiturik eta isiltzeko keinu eginda, honela hitz egin zien: «Israeldarrok eta Jainkoaren beldur zaretenok, entzun: Israel herri honen Jainkoak gure aurrekoak aukeratu zituen, eta herria ugaritu zuen, Egipton arrotz zirelarik, eta bere besoaren indar handiaz atera zituen handik.

Gero, David eman zien errege, harentzat aitormen hau eginez: "Aurkitu dut David, Jeseren semea, nire gogoko gizona, nire agindu guztiak beteko dituen".

Hitzemana zeukanez, honen hazitik atera zion Jainkoak Israeli Salbatzailea, Jesus. Berau etorri baino lehen, Joanek bihotz-

berritzeko bataioa hots egin zion Israel osoari. Eta bere bizitza bukatzera zihoanean, honela zioen Joanek: "Ez naiz ni zuek uste duzuen; badator nire ondoren beste bat, eta ni ez naiz inor Haren oinetakoak askatzeko ere"».

Aleluia

A - le-lu - ia, a - le-lu - ia, a - le-lu - ia, a - le-lu - ia.

Bihar ezereztua izango da
lurraren gaiztakeria;
eta munduaren Salbatzailea izango da
gure erregea. R/.

Ebanjelioa (Mt 1, 1-25)

(GAUERDIKO MEZA)

Lehenengo irakurgaia (Is 9, 2-4. 6-7)

Isaias profetaren liburutik

Ilunpetan zebilen herriak argi handi bat ikusi zuen; herio itzalean bizi zirenak distira batek argitu zituen.

Gehitu zenuen poza eta handitu, atsegina; pozetan dabilta zure aurrean, igitai aroan izaten den pozez, harrapakinak banatzekoan izaten den atseginez. Puskatu baituzu haren uztarri astuna, haren bizkar makila, eta zapaltzailearen zigorra, Madiango egun hartan bezala.

Haur bat jaio baitzaigu, seme bat eman zaigu; aginpidea sorbaldan darama; eta haren izena: Kontsejatzaille harrigarri, Jaungoiko indartsu, Betiko Aita, Bake errege. Bere erregetza zabal dezan, amairik gabeko bakea ezarriz, Daviden aulkian eta bere herrian. Sendotu eta indartu dezan, zintzotasunez eta zuzentasunez, gaurdanik eta betidaino. Diren guztien Jaunaren maite minak egingo du hau.

Erantzun-salmoa (Sal 95, 1-2. 3 eta 11-12a. 12bcd-13)

Gaur ja - io zai - gu Sal - ba - tzai - le - a Kris - to, gu - re

Jaun e - ta Ja - be - a

Kanta Jaunari kantu berri,
kanta, lur osoa, Jaunari.
Kanta Jaunari, bedeinka Haren izena,
iragarri egunez egun, Harengandiko salbamena. R/.

Zabaldu Haren ospea atzerrietan,
Haren mirariak herri guztietan.
Poztu bedi ortzia, alaitu lurra, '
orro egin beza itsasoak bertan bizi direnekin,
txalo egin beza landak bertan dauden guztiekin. R/.

Poztu bitez basoko zuhaitzak, '
Jaunaren aurrean, badatorrelako,
lurra epaitzera datorrelako.
Zuzenbidez epaituko du lurbira,
eta leialtasunez herriak. R/.

Bigarren irakurgaia (*Tt 2, 11-14*)

San Paulo Apostoluak Titori

Agertu zaigu Jaungoikoaren grazia, gizaki guztion salbamenerako. Jainkorik gabeko bizitzari eta munduko grina txarrei uko egiten, eta neurritz, zuzentasunez eta jainkozaletasunez mundu honetan bizitzen erakusten digula; zorioneko itxaropenari begira, Jesu Kristo gure Salbatzaile eta Jaungoiko handiaren agertze ospetsua itxaroten dugula. Hark guregatik eman zuen bere burua, gu gaiztakeria guztietatik ateratzeko eta bere herri garbi eta egintza onen zale egiteko.

Aleluia (*Lk 2, 10b-11a*)

Poz handi baten berri ona dakarkizuet:
salbatzaile bat jaio zaizue gaur:
Mesias, Jauna. R/.

Ebanjelioa (*Lk 2, 1-14*)

(GOIZEKO MEZA)

Lehenengo irakurgaia (*Is 62, 11-12*)

Isaias profetaren liburutik

Horra, Jaunak azken mugetaraino adierazi duena: «Esan Siongo hiriari: Badatorkizu zeure Salbatzailea; Berekin dakar bere saria; eta

bere aurretik, irabazia. "Herri santu" deituko diete, "Jaunak askatuak"; eta zuri, "Herri maitagarri", "Herria ez utzia" deituko dizute».

Erantzun-salmoa (Sal 96, 1 eta 6. 11-12)

Hi - tza ha-ra - gi e - gin zai - gu. Gu - re - an Ha-
ren bi - zi - le - ku.

Jauna errege da! Alai bedi lurbira,
poztu bitez uharte guztiak.
Adierazten du ortziak Haren zuzentasuna,
herri guztiek dakuste Haren edertasuna. R/.

Argia sortu zaio zintzoari,
alaitasuna bihotz-zuzenari.
Poztu zaitezte, zintzoak, Jaunarengan,
ospa ezazue Haren izen santua. R/.

Bigarren irakurgaia (Tt 3, 4-7)

San Paulo Apostoluak Titori

Jaungoiko gure salbatzailearen bihotz ona eta gizakienganako onginahia agertu zaigunean, salbatu egin gaitu, ez guk egindako zuzenbidezko egintzengatik, baizik eta bere errukiagatik; Espiritu Santua dohain ematen duen jaiotze berriaren garbaldiz eta zaharberritzez; Espiritu hori oparo eman baitigu Jaungoikoak, Jesu

Kristo gure salbatzailearen bitartez. Horrela, onginahi hutsez Jainkoak zuzen egiten gaituelarik, itxaropenez betiko bizitzaren oinordeko egin gara.

Aleluia (Lk 2, 14)

A - le-lu - ia, a - le-lu - ia, a - le-lu - ia, a - le-lu - ia.

Aintza zeruetan Jaungoikoari,
eta bakea lurrean Haren gogoko gizakiei. R/.

Ebanjelioa (Lk 2, 15-20)

(EGUNEKO MEZA)

Lehenengo irakurgaia (Is 52, 7-10)

Isaias profetaren liburutik

Bai ederrak direla mendi gainetan, bakea hots egiten duen mezulariaren oinak! Berri ona zabaltzen eta salbamena iragartzen dabilenarenak! Sioni «gure Jaungoikoa errega da» esaten dionarenak! Entzun: zure zaintzaileak oihuka ari dira, irrintzika, guztiak batera; aurrez aurre ikusten baitute Jauna, berriro Siona datorrela. Ekin kantari, guztiok batera, Jerusalemgo horma zahar eroriok; poztu baitu Jaunak bere herria; eta berrerosi du Jerusalem. Herri guztien aurrean erakutsi du Jaunak bere beso santuaren indarra; eta lurbiraren bazter guztiok ikusiko dute gure Jaungoikoaren salbamena.

Erantzun-salmoa (*Sal* 97, 1. 2-3ab. 3cd-4. 5-6)

I - ku - si du - te lur mu - ga de - nek gu - re Jain - ko -
 a - gan - di - ko ga - rai - pe - na.

Kanta Jaunari kantu berri,
 egin baititu hainbat harrigarri.
 Bere eskuinak eman dio garaipena,
 bere beso santuak. R/.

Ezagarazi du Jaunak Beragandiko garaipena,
 agertu du atzerrien aurrean bere zuzentasuna.
 Oroitu da bere maitasunaz,
 Israel etxeari dion leialtasunaz. R/.

Ikusi dute lur muga denek
 gure Jainkoagandiko garaipena.
 Lur osoa, egiozu txalo Jaunari,
 egin oihu eta irrintzi, egin eresi. R/.

Eresi Jaunari kitararekin,
 kitara eta salteri ozenarekin;
 turuta eta adar hotsean,
 egin txalo errege den Jaunaren aurrean. R/.

Bigarren irakurgaia (*Hb* 1, 1-6)

Hebrearrei egindako epistolatik

Askotan eta era askotara hitz egin zien Jaungoikoak Profeten bidez aspalditik gure arbasoei; eta azkenak diren egun hauetan, Semearen bidez hitz egin digu. Seme hau egin zuen gauza guztien oinordeko; eta Beraren bidez egin zuen mundua ere.

Bera da, Aitaren aintzaren argi distiratsu eta Haren izatearen irudi. Berak eusten die gauza guztiei bere hitz indartsuz. Eta bekatuena garbikuntza egin ondoren, goienean Guztiz Handiaren eskuin aldean jarririk dago: zenbat eta aingeruak baino goragoko izena jaso duen, hainbat eta haiek baino gorago jarria.

Izan ere, zein aingeruri esan dio inoiz: «Nire Seme zara Zu; Nik zaitut gaur Zu sortu»? Eta beste behin: «Aita izango nau Ni, Hark eta Hura Seme izango dut Nik»? Eta beste behin, bere Semea munduan sartzerakoan, honela dio: «Gur bezate Bera Jaungoikoaren aingeru guztiek».

Aleluia



A - le-lu - ia, a - le-lu - ia, a - le-lu - ia, a - le-lu - ia.



Egun santu bat zabaldu zaigu:
zatozte, herriak; gurtu ezazue Jauna;
argi handi bat jaitsi da gaur lurrera. R/.

Ebanjelioa (Jn 1, 1-18)

Homiliarako argibideak

Ez zegoen haientzat tokirik

Errefuxiatu eta etorkinen egoerak Gabonetako misterioa gaurkotzen du: ez dago haientzat lekurik. Aberatsentzat eta ondasunak dituztenentzat, beti dago lekua, baina pobreentzat, sekula ez. Ondasunik gabeko familia txiro batean jaio zen Jainkoa, munduko pobreekin eta etxegabetuekin solidarizatu ahal izateko.

Gure herrialde aberatsek beldurra diote erosotasun hori arriskuan jar dezakeen edozeri. Beldurra diote bizitzari, beldurra umeei. Grazia da jaiotza oro, Jainkoaren dohaina. Garai hauetan batez ere, oso haur gutxi jaiotzen baitira European. Ezin hobeto erakusten dute, baina, bizitzak merezi duela, bizitza ez dela bizitzeko eta gozatzeko bakarrik, eman ere egin behar dela bizia. Jesusen jaiotzaren kasuan, modu berezian agertzen zaigu **Jainkoaren grazia** (Tt 2,11-14). Jesus da Jainkoaren oparirik handiena. Jainkoa bera eman zaigu haur horretan. Jainkoak duen goxotasun horrekin eman zaigu, ito eta estutu gabe. Bizitzeko eta hazteko norbaitek zain dezan behar duen ume baten gisa ageri zaigu. Ostatu bila jotzen du Jainkoak gure atea, maitasun bila (Lk 2,1-14).

Gizakion **salbamena** dakar Haren etorrerak. Gure bizitzaren zentzua aurkitu dugu Jesusengan, gutako bakoitzaren misterioa. Gizakia ezin da bizi gauza materialei begira bakarrik; Jainkoaren intimitatean sartzerat deituta dago, lehenengo Jainkoa sartu delako gure bizitzaren intimitatean. Gizakia Jainko izan dadin egin da Jainkoa gizaki, Eliza Gurasoen arabera. Gizakia bete-betean errealizatzea darama Jesusen bizimoduak. Jaunaren etorrerara bideratutako bizimodua da; garai guztien amaieran etorriko da, eta garai horretan gaude, dagoeneko. Lasaitasun handiz bizitzera garamatza horrek; ez da lasaitasun aspergarria, eduki baliotsua ematen dio gure bizitzari. Jesusek bere bizia emateak geuk ere ematera deitzen gaitu. Horrela, dohain bihurtzen da gure bizia, besteentzako grazia.

Jesusen presentziak gure munduaren gau iluna argitzen du, eta artzainek egun batean bezala, haren zain dauden guztiak hartzen ditu bere argitan. Ilunpean zihoan herria, eta argi handi bat ikusi zuen (Is 9,2-7). Jaunaren **piztueraren argia** da, noski, Jesusen bizitza eta jaiotza argitzen dituen misterioa. Piztueraren, gure piztuera propioaren ikuspegirik gabe, kontsumo hutsa bihurtzen dira Gabonak. Jaun berpiztuaren poz amaigabeaz gozatzerantz deituta gaude, ordea, bere jaiotzarekin etorri baitzen gure munduaren errealitatera. Jende gehiena ez zen jabetu, orduan, baina fedez hartu zutenek, Mariak, Josek, artzainek, Simeonek eta Anak, guztiz eraldatuta ikusi zituzten euren bizitzak, graziaz beteta, Jainkoak euren nahi guztiak bete baitzituen.

Gure eguneroko zapalketa eta zama guztietatik askatzen gaitu Jesusen jaiotzak, gauzen alienaziotik. Jainkoari eta anaia-arreba zehatzei zabaldua bakarrik salbatzen dugu bizia, horrek ematen dio zentzua. Profetak iragarritako askatasuna ez du heroi batek edo supergizaki batek ekarriko, ordea; hori da deigarriena: haurtxo batek ekartzea. **Giza aurpegia** eduki nahi izan du Jainkoak, eta haurtxo baten aurpegia aukeratu du Jainkoaren poza eta bakea islatzen dituelako. Bakea, eta Jaunak mundura ekarritako poza ekar diezazkizuetela Gabonek, horixe opa dizuet.

Jainkoaren herriaren otoitza

Fedez beterik bat egin dezagun, senideok, mundu zabaleko kristau guztiekin eta egin dezagun otoitz Kristoren jaiotzaz hasitako salbamena lurraren bazter guztietara iritsi dadin:

Erantzuna: Erakuts guri, Jauna, zure bihotza ona.



- Eguberriaren misterioa alaitasunez ospatzen ari diren Elizaren seme-alaba guztiak jaio daitezela justiziazko, maitasunezko eta bakezko bizi berri batera. Egigun otoitz. R/.
- Gizaki guztiak Kristo, Jauna, ezagutzera hel daitezen eta Bere inguruan betiko bil daitezen, galduta zeudenak bilatzera eta salbatzera etorria denez. Egigun otoitz. R/.
- Gure giza izatea hartu zuen Jainkoaren Semea izan dadila negar egiten dutenentzat poz, gaixoentzat osasun, hiltzorian daudenen babes eta egun hauetan bakarrik eta triste daudenentzat goiko indar. Egigun otoitz. R/.
- Jai hauetan elkartzen diren gure familietan haz dadin, Jesus, Jainkoaren Seme eta gure Salbatzailearenganako fedea. Egigun otoitz. R/.

Jesu Kristo Jauna, Eguberriaren misterioaren bidez giza familiaren nekeak eta mugak zeure egin dituzu; entzun Zure Elizaren otoitza eta egizu sinets dezagula Aita eta Zu ezagutzeak dakarrela guztiontzat betiko bizia. Errege bizi baitzara gizaldi eta gizaldietan.

Eukaristiaren liturgiari oharpena

Ospakizun honetan ere presente egiten da Jesus, entzun berri dugun Bere Hitzaren bidez, baina batez ere orain aldare honetan gertatuko denaren bidez: ogia eta ardoa Kristoren Gorputz-Odol egingo dira. Eskerrak eman diezazkiogun.

Prefazioa: Eguberritako I. Prefazioa. (*Meza-liburuan, 314. or.*)

Jaunartze-ondorengo otoitza

(Bezpera-arratsaldeko Meza)

**Sakramentu honetan jan-edari santuak
eman dizkiguzu, Jauna;
zure Semearen jaiotza ospatuz,
indaberri gaitzela.
Jesu Kristo gure Jaunaren bitartez.**

(Gauerdiko Meza)

**Pozez gainezka ospatzen dugu, Jauna,
Kristo gure Salbatzailearen jaiotza;
emaguzu, orain santuki bizitzea,
eta egunen batean Kristorekin bat egitea.
Errege bizi baita gizaldi eta gizaldietan.**

(Goizeko Meza)

**Poz handiz ospatu dugu, Jauna, zure Semearen jaiotza;
emaguzu, misterio honen bihotza fede santuz ezagutzea
eta gero eta maitasun handiagoz maitatzea.
Jesu Kristo gure Jaunaren bitartez.**

(Eguneko Meza)

**Jainko guztiz errukitsua,
munduaren Salbatzaileak, gaur jaioz,
Jainkoaren seme-alaba sorrarazten gaituen bezala,
hilezkor ere egin gaitzala.
Errege bizi baita gizaldi eta gizaldietan.**

Bedeinkapen Nagusia

Jauna zuekin. R/. Eta zure espirituarekin.

Makur zaitezte, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Jainko guztiz onak, bere Semea gizon egitearekin,
uxatu ditu munduko ilunpeak,
eta Maria Birjinagandik jaiotzearekin
argitu gau [egun] santu hau:
uxa ditzala Berak zuengandik bekatuaren ilunpeak
eta zuen bihotzak bere graziaren distiraz argitu. R/. Amen.**

**Kristoren jaiotza salbagarriaren berri
artzainei aingeruen bidez eman zienak,
bete ditzala bere pozez zuen bihotzak
eta egin zaitzatela bere berri onaren zabaltzaile. R/. Amen.**

**Bere Semearen gizon egiteaz
zeru-lurrak bat egin dituenak,
bete zaitzatela bere bakez eta gogo onez,
eta zeruko Elizarekin bat egitera eraman. R/. Amen.**

**Bedeinka zaitzatela Jainko ahalguztidunak:
Aitak, eta Semeak, + eta Espiritu Santuak. R/. Amen.**

Zoazte Jaunaren bakean. R/. Eskerrak Jainkoari.